

СЛУЖБА ПРЕСВЯТЕЙ БОГОРОДИЦЕ пред чудотворной Ея иконой ГОРБАНЕВСКОЙ

На велицей вечерни

Поем Блажен муж.

На Господи, воззвах стихир 8, глас 1. Подобен: О, дивное чудо:

О, велие чудо!* на месте необитаемом благодать Божия спасительная изливается*, и честный образ Богоматере знаменными исцелений дивно прославляется*. Веселися, граде Полтаво,* радуйтесь, людие Христоименитии*, возопиим верно* Царице Богоизбранней Богоотроковице*: Благодатная, радуйся*, с Тобою Господь*, подай мируи* Тобою велию милость. (трижды)

Дивны Твоя тайны, Богородице*, яко залог любви к роду христианскому* дарствуеши священную икону Твою* небесной благодати исполненну*. Слава Твоя благолепная богодарованными сияет чудесы*; свыше бо призираеши на нас, Владычице*, и милостию Своею грешныя покрываеши*; Благодатная, радуйся*, с Тобою Господь*, подай мируи* Тобою велию милость. (дважды)

Чертог зрим украшенный храм Твой, Богородице,* в нем же непрестанно покланяемся* живоносному образу Твоему*, радуемся, земнороднии*, о Божественной славе Твоей красящиеся*, чаем милости Твоя богатыя*, и благодарственная пения воспеваем*: Благодатная, радуйся*, с Тобою Господь*, подай мируи* Тобою велию милость. (дважды)

Слава, глас 2. Подобен: Киими похвальными

Киими похвальными венцы украсим пресветлый праздник Владычицы нашея, украсившия храм сей чудотворным образом Своим: се Царица Богоотроковица прииде. Той достойную честь воздати немошно: сей есть дар многоценный За-

ступницы мира. Недоразумеваемая и непостижная днесь содеваются Тобою и страшная таинства, о Владычице Богоблагодатная: се море чудес неисчерпаемое, и врачевание безмездное страждущим душами и телесы. Темже вопием Ти: Радуйся, Радосте наша, избави нас от всякаго зла, Радуйся, всех Упование, Владычице.

И ныне, глас 6:

Приидите, празднолюбных собори, Пресвятую Деву Богоотроковицу ублажим, радости бо и спасения Ходатаица бысть мирови, яко рождающая Христа Бога. Сию бо Отец Пребезначальный от всех родов Едину избранную Дщерь Себе именовал; Сын Собезначальный и Соприсносущный в Матерь избра; Дух же Святыи яко Пречистую Невесту Себе боголепно сочетал. Сию, яко Богоизбранную и благословенную в женах, вышния силы немолчными песньми величают, Гавриила имущи чиноначальника: Благодатная, радуйся, с Тобою Господь. Сию патриарси, пророцы и вси святии с Давидом благоглаголивый радостными гласы воспевают: Предста Царица одесную Тебе, Владыко, рясны златыми одеяна и преукрашена Божественными благолепотами. Сию, яко державную Заступницу рода нашего и мы, недостойнии, воспоим: Радуйся, Церкви чудное украшение и всему миру предивный покров; радуйся, верным людям пособие во бранех и воином крепосте: радуйся, покрове, похвало и радости всех земнородных; радуйся, Божественное утешение всех скорбящих и обидимых; радуйся, обрадованная, с Тобою Господь, подавай мирови Тобою велию милость.

(Или Богородичен догмат втораго гласа, Прейде сень законная).

Вход. Прокимен дне и чтения три:

Бытия чтение:

Изыде Иаков от студенца клятвеннаго, и иде в Харрань, и обрете место, и спа тамо, зайде бо солнце. И взят от камня

места того, и положи возглавие себе, и спа на месте оном. И сон виде: и се лествица утверждена на земли, еяже глава досязаше до небес, и Ангели Божии восхождаху и низхождаху по ней: Господь же утверждашеся на ней, и рече: Аз Бог Авраамов отца твоего, и Бог Исааков, не бойся. Земля, идеже ты спиши на ней, тебе дам ю, и семени твоему. И будет семя твое яко песок земный, и распространится на море, и ливу, и север, и на востоки: и возблагодарятся о тебе вся колена земная, и о семени твоём. И се Аз с тобою сохраняяй тя на всяком пути, аможе аще пойдёши. И возвращу тя в землю сию: яко не имам тебе оставить, дондеже сотворити ми вся, елика глаголах тебе. И воста Иаков от сна своего, и рече яко есть Господь на месте сем, аз же не ведех. И убояся, и рече: яко страшно место сие; несть сие, но Дом Божий, и сия врата небесная.

Пророчества Иезекиилева чтение:

Так о глаголет Господь: будет от дне осмаго: и прочее. Сотворят иереи на олтари всесожжения ваша, и яже спасения вашего: и прииму вы, глаголет Адонаи Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут, и не отверзнутся: и никтоже пройдет сквозе их, яко Господь Бог Израилев пройдет ими, и будут затворена. Яко Игумен сядет в них снести хлеб. По пути еламских врат внидет, и по пути Его изыдет. И введе мя по пути врат святых, сущих к северу, прямо храму: и видех, и се исполнь славы храм Господень.

Притчей чтение:

Премудрость созда Себе дом, и утверди столпов седмь. Закла Своя жертвенная, и раствори в чаши Своей вино, и уготова Свою трапезу. Посла Своя рабы, созывающии с высоким проповеданием на чашу, глаголющи: иже есть безумен, да уклонится ко Мне. И требующим ума рече: приидите, ядите Мой хлеб, и пейте вино, яже растворих вам. Оставьте безу-

мие, и живи будете: и взыщите разума, да поживете, и исправите разум в ведении. Наказуяй злыя, примет себе безчестие: обличаяй же нечестиваго, опорочит себе: обличение бо нечестивому, раны ему. Не обличай злых, да не возненавидят тебе. Обличай премудра, и возлюбит тя. Дажь премудрому вину, и премудрший будет. Сказуй праведному, и приложит принимать. Начало премудрости страх Господень: и совет святых разум. Разумети бо закон, помысла есть благаго: сим бо образом многое поживеши время, и приложатся тебе лета живота.

На литии стихиры, глас 8:

Предстательнице верных, Богородительнице, скорбящих радости и плачущих великое утешение, моли Сына Твоего, Христа Бога нашего, со Ангелы и Апостолы и всеми святыми, избавити нас, в час испытания, лютаго осуждения, да Тобою спасение улучивше, во веки славим Тя, Препоблагословенная.

Верою притекаю к покрову Твоему, Богородительнице Пречистая: от напастей и бед, и страстей томления, и бесовскаго озлобления спаси мя, яко милости имущи пучину, и спасения явльшися Ходатаица, Владычице, Яже Бога рождши Милостиваго, Единого Всещедраго и Многоблагоутробнаго.

Слава, глас тойже:

В день праздника нашего вострубим трубою песней: торжествуй, соборный храме, имеяй Державную Помошницу в скорбех многмятежнаго жития нашего, и крепкое заступление в напастех, незримую Наставницу ко спасению, о всем мире Молитвенницу теплую.

И ныне:

О, Госпоже, Царице и Владычице, умиленною душею смиренно молим Тя: приклони ухо Твое к молению грешных рабов Твоих, Тя призывающих, и сподоби нас райских селений причастники быти, да бесконечно славим Тя, Едину Чистую и Препрославленную.

Тропарь, глас 4:

Заступнице и Похвало земли нашея Полтавския, Пречистая Дево Богоневесто Владычице! Многообразную благодать от святых Твоя иконы стяжавше, молим Тя, смирении и грешнии: о, Всепетая Мати Бога нашего, Молитвеннице теплая, чудес и исцелений подательнице, не отвратися тока слез наших, но приими моления рабов Твоих; не ввери нас человеческому предстательству, да не до конца погибнем от беззаконий наших, но покрый нас всечестным покровом Твоим, и изми ны от лежащих на нас бед и скорбей; моли Сына Твоего, Христа Бога нашего, грехов оставление нам даровати, и жизни вечныя причастники быти сотвори; на Тя бо по Бозе все упование наше возлагаем, Пресвятая Дево.

Ин тропарь, тогожде гласа:

Заступнице Усердная, Мати Господа Вышняго, за всех молиши Сына Твоего, Христа Бога нашего, и всем твориши спастися, в державный Твой покров прибегающим; всех нас заступи, о, Госпоже Царице и Владычице, же в напастех, и скорбех, и болезнях, обремененных грехи многими, предстоящих и молящихся Тебе умиленною душею и сокрушенным сердцем пред Пречистым Твоим образом со слезами, и не возвратно надежду имущих на Тя, избавление всех зол, всем полезная даруй, и вся спаси, Богородице Дево, Ты бо еси Божественный покров рабам Твоим.

На стиховне стихиры, глас 2:

Яко всех вышшу сущую небесных и земных, Херувим славнейшую, и всея твари честнейшую, Тебе, Заступницу и покров Христианскому роду Христос дарова, покрывати и спасати люди согрешившия, к Тебе прибегающия; темже, Прибежище всех, Тебе воспеваем, Владычице, Обрадованная Радосте всех, и честный и благознаменитый твой праздник празднуем светло, Христа моляще даровати нам Тобою велию милость.

Глас 5:

Стих: Слыши, Дщи, и виждь, и приклони ухо Твое.

Воспоим, людие, светло Давидскую песнь Отроковице Богоневесте, Матери всех Царя Христа: предста Царица одесную Тебе, Владыко, рясны златыми одеяна и преукрашена Божественными лепотами. Сию бо, избранную в женах паче всего мира удобрив, благоизволи Бог родиться из Нея, великия ради Своея милости.

Стих: Лицу Твоему помолятся богатии людстии.

Воспоим, людие, светло Давидскую песнь Отроковице Богоневесте, Матери всех Царя Христа: предста Царица одесную Тебе, Владыко, рясны златыми одеяна и преукрашена Божественными лепотами. Сию бо, избранную в женах, благоизволи Бог Помощницу людем Своим даровати, строити и покрывати от всех бед рабы Своя, Едину благословенную.

Слава, И ныне, глас тойже:

Храм и дверь еси, Палата и Престол Царев, Дево Всечестная, Еюже Избавитель Мой, Христос Господь, во тьме спящим явися, Солнце Сый правды, просветити хотя яже созда по Образу Своему рукою Своею. Темже, Всепетая, яко Матернее дерзновение к Нему стяжавшая, непрестанно моли спастися душам нашим.

На утрени

Бог Господь, глас 4, и тропарь иконе, Заступнице и Похвало, дважды; Слава, и ныне: ин тропарь, Заступнице Усердная.

По первом стихословии седален, глас 5:

Утоли болезни многовоздыхающия души моя, утолившая всяку слезу от лица земли: Ты бо человеков болезни отгониши, и грешных скорби разрушаеши. Тебе бо вси стяжахом надежду и утверждение, Пресвятая Мати Дево.

Слава, и ныне, тойже

По втором стихословии седален, глас 6:

Упование мира, Благая Богородительнице Дево, Твое и единое страшное предстательство просим: умиლოსердися на люди беспомощныя, и моли Милостиваго Бога избавитися душам нашим от всякаго прещения, Едина Благословенная.

Слава, и ныне, тойже.

Полиелей. Величание:

Величаем Тя, Пресвятая Дево, и чтим образ Твой святыи, егоже во утешение людем Твоим и земли Полтавстей явила еси.

И псалом избранный.

По полиелеи седален, глас 1:

Девического Твоего чрева красен клас явлься, израстила бо еси мирови жизнь. Сего ради силы небесныя вопиют Тебе, Богородице, славяще честное Твое празднество, Пречистая: слава девству Твоему, слава образу Твоему, Мати безвестная.

Слава, и ныне: Тойже.

Степенна: 1 антифон 4 гласа: От юности моя.

Прокимен, глас 4: Помяну имя Твое* во всяком роде и роде.

Стих: Лицу Твоему помолятся богатии людстии.

Евангелие: Луки, зачало 4.

Псалом 50. Слава: Молитвами Богородицы. И ныне: Молитвами Богородицы. Помилуй мя, Боже.

И стихира, глас 6:

Днесь благодать Святаго Духа нас собра во священное жилище; под кров Твой, Богородице, прибегающе, верою молим Тя, Помощница всем благонадежная, соблюдай и покрывай нас чрез все житие, даруй нам светом Твоим ходити, огнен-

ные стрелы врага угаси, в час смертный предстани и сподоби нас улучшить Царствие Сына Твоего, да вси Архангельский глас восприимше, рцем: Марие, Господь с Тобою; радуйся, Благословенная в женах, яко Спаса родила еси душ наших.

Канон, глас 4.

Песнь 1.

Ирмос: Отверзу уста моя, и наполнятся Духа, и слово отрыгну Царице Матери, и явлюся светло торжествуя, и воспою радуясь Тоя чудеса.

Ангел вопияше Тебе, Дево Чистая: Радуйся; мы же что Ти принесем, Благаго Царя Благая Мати? Явила бо еси нам в сия последняя времена сокровище неоскудное – чудотворную икону Твою – во освящение и исцеление душ наших.

Ты буди нам утверждение и в бедах скорое заступление, Царице небесе и земли, на Тебе надеемся, непрестанно моляще Твою благостыню.

Яко страждущим скоро являла еси Твою благодать, не отступай, Пречистая Дево, утешением Твоим, и от нас, в бедах и злоключениях сущих, да Тя присно величаем.

Яже Бога Слова человеком преславным Твоим рождеством соединившая, Дево Богоневесто, утоли церковныя соблазны, и подаждь мир вселенней, яко Благая.

Песнь 3.

Ирмос: Твоя песнословцы, Богородице, живой и независтный Источниче, лик себе совокупльшия духовно утверди, в Божественней Твоей славе венцев славы сподоби.

Богатство духовное неисчерпаемое даровала еси рабом Твоим, икону Твою священную, еяже прославление светло празднующе, вернии, избавляемся от всяких скорбных обстояний, о Пренепорочная Дево, Жизнь всех – Христа – рождшая.

Святая Владычице Чистая, Бога нашего Мати, всех Творца неизреченно рождающая, моли всегда благость Его страстей нас избавити и оставление нам подати грехов.

Не оскудевай, Пренепорочная Дево, молитвами Твоими, и сохрани стадо Твое, еже собрати благоволила еси, Мати Пастыреначальника Господа Иисуса Христа, да ни едина погибнет от овец Твоих.

Положи Тя Бог пристанище сущим в бедах, Чистая, от Тебе благоволивый восприяти плоть; темже Ти припадающе взываем: даруй помощь Твою рабам Твоим.

Таже седален, глас 8:

Риторы глаголы не довлеют воспети по достоянию, о Мати Бога нашего, дивная чудеса и неисчислимыя благодеяния Твоя, от иконы сея являемая; мы же, во смирении сердца тайно вещаем Ти, Ангелов честнейшей: Радуйся, благодатная, пребуди, Милосердная, с нами неотступно во веки.

Слава, и ныне, глас 4:

Церковь Твоя светло празднует Твоего славного образа явление, и вси поюще зовем Ти прилежно: вся верная укрепи на вражью силу, и советы беззаконных разори, и житие наше направи творити Божественную волю Сына Твоего.

Песнь 4.

Ирмос: Седяй в славе, на Престоле Божества, во облаце легце прииде Иисус Пребожественный, нетленною дланию, и спасе зовущия: Слава, Христе, силе Твоей.

Кий ум постигнуть возможет силу благодатных исцелений, исходящую от лика Твоего святаго, в Божественном сем храме пребывающаго? Избави же нас бесовския прелести, озлобления же и вреда, и искушения, да верою Тя славим, сущую по Бозе Заступницу и Покров наш.

Озари, всепетая Дево, разумом истиннаго боговедения помраченный ум наш, да не погибнем люте во гресех наших;

помыслами благочестия сердца наша просвети, да, спасении Тобою с радостию воспоим: слава силе, слава и милосердию Твоему, Господи, Благодателю Всеблагий.

Избавльшеся Тобою праматерняя печали, Богородительнице, веселие всем рождающая и всемирную радость, утешения исполнени быхом; темже, Всепетая, Твоя песнословцы от бед Твоими молитвами соблюди.

Молим Тя, прежде век избранную в Матерь Вседержителя, стягни расслабленные духом души наша, оживи росой покаяния сердечного и молитвы слезной; утверди в сердцах рабов Твоих веру истинную и любовь нелицемерную, да сподобимся подвигом добрым подвизаться, веру непорочную соблюсти, житие мирно скончати, хвалебно Господеви поя: слава долготерпению Твоему, Спасе наш!

Песнь 5.

Ирмос: Ужасошася всяческая о Божественной славе Твоей: Ты бо, неискусобрачная Дево, имела еси во утробе над всеми Бога, и родила еси Безлетного Сына, всем воспевающим Тя мир подавающая.

Ни ум Ангельский, ниже язык человеческий возможет изрещи множества знамений дивных помощи Твоея, Пренепорочная Владычице, роду человеческому в нуждах душевных и телесных, благодеяния Твоя паче звезд небесных сияют во всем мире Твоем; приими убо благодарения сия недостойная, о Дево Богоневестная, непрестанно славимая Горними Силами.

Коль чудны дела Твоя, Господи! се бо яко солнце мирови возсия пречестная икона Препоблагословенная Матере Твоея, верных мысли просвещающая, Тя, Христе, величающих присно.

Сей святой день радостный, Богомудреннии, приидите, песнями и пении духовными празднуем светло, ныне всебла-

голепно зряще храм Пречистыя, иконою световидно украша-
емь, яко пребывание славы Приснодевы zde явился; молимся
Ти прилежно, яко сущей с нами, Богородительнице, во еже
благодатию Твоею озаритися нам.

Ныне небо и земля веселится, и чини Ангелов и человеков
собрание изрядно празднующе, воспоим Христа, даровавшего
нам Божественное наслаждение – образ Свой священный и
Пречистыя Матере Своея.

Песнь 6.

Ирмос: Божественное сие и всечестное совершающе
празднество, богомудрии Богоматере, приидите, руками вос-
плещим, от Нея рождаемого Бога славим.

Достойно есть величати Тя, Богородицу, даровавшую нам
пречестный образ Свой в помощь и заступление Божествен-
ное граду сему от враг видимых и невидимых.

Достойно есть величати Тя, яже в вышних Престолу Жи-
воначальная Троицы предстоящую, от Ангел воспеваемую
Деву Пречистую, и от земных яко Богоневестную Матерь
присно прославляемую.

Величаем Тя, Пресвятая Дево, и почитаем светоносный
образ Твой, егоже во утверждение граду Полтаве положила
еси, да пребудет в нем вера Православная и благочестие от
ныне и до века.

Во всю землю нашу возсия свыше данный благочестно по-
кланяемый образ Твой, Богоизбранная Отроковице, и Божест-
венною благодатию покрывается храм сей, верно Бога про-
славляющий.

Кондак, глас 8:

Светоносная палата уготовася Тебе, Владычице, святой
Соборный храм града нашего, в немже всечестная икона
Твоя, якоже солнце светозарное возсия. Ты же, Чистая, благо-
дарения наша и поклонения иконе Твоей приемлюще, не от-

вергай нас, призывающих Тя с верою и умилением. Озари души наша светом благодати Твоея, да никтоже из притекающих к Тебе изыдет отсюда тощ и неуслышан. О, Богомати, милости Источнице, управи пути жития нашего и советы наша в правде, во еже открытися в них Царствию Христову; Ты бо еси Молитвенница усердная о граде нашем, и земли наша Похвала и Покров.

(Или сей: Не имамы иныя помощи, не имамы иныя надежды разве Тебе, Владычице, Ты нам помози: на Тебе надеемся, и Тобою хвалимся: Твои бо есмы раби, да не постыдимся.)

Икос:

Высоту небеснаго жития и славы присносущныя Божественное осияние даруй рабом Твоим, любоблагоутробная Мати Дево Марие, и сподоби совершити преславное торжество во свете добродетелей и помышлений, духовно сияющих; свыше бо облагодатствовала еси живоносный образ Твой, Богоизбранная Невесто, и яко лучами солнечными и чудесными знаменами согреваеши сердца благочестно почитающих и верою покланяющихся, якоже Тебе Самой, сущей с нами, святей иконе Твоей, юже со страхом окружают от небес Ангели святии; сия убо икона, якоже луна пресветлая в нощи отгонит тму болезней и скорбей от всех, иже желанием сердечным умиленно притекают ко благосердию Твоему, и, радуящиеся о Божественной благодати, величают Тя, зовуще: Радуйся, предстательство Христиан непостыдное и храма соборнаго красото и радование.

Песнь 7.

Ирмос: Не послужиша твари богомудрии паче Создавшаго, но огненное прещение мужески поправше, радовахуся поюще: препетый отцев Господь и Бог благословен еси.

Да сликовствует церковней светлости любовию Божественною Ангельское воинство, Богомудренно воспевающее: благословен еси в храме славы Твоея, Господи.

Паче вышних ликостояний вознеслася еси, Всечистая, Едина сущи Мати Вседетеля; темже радующеся взываем: Благословенна Ты в женах еси, Всенепорочная Владычице.

Церковь земнородных торжествующи радуется, зрящи Божественною лепотою украшенную икону Матери Господней, и единомудренно воспеваает: благословенна еси, Владычице, просвети нас светом Сына Твоего.

Почесть и поклонение приносящи Тебе, Дево Чистая, Девственная Похвало, о Тебе радуется, Благодатная, всякая тварь, Ангельский собор и человеческий род, достойно взывающи: Благословенна еси, Владычице, Дево Неискусобрачная.

Песнь 8.

Ирмос: Отроки благочестивыя в пещи, Рождество Богородичо спасло есть. Тогда убо образуемое, ныне же действуемое, вселенную всю воздвизает пети Тебе: Господа пойте дела, и превозносите во вся веки.

Лучами Света умнаго освещаем Божественный Дом Твой, осеняет ныне всех облаком Духа Святаго, и освящает верныя, согласно поющия: благословите вся дела Господня, Господа.

Честь и славу стяжавший священнописанный образ Богородицы и Предвечнаго Младенца Христа Жизнодавца лобзающе, со благоговением притецем, вернии, воспевающе: благословите вся дела Господня, Господа.

Умиленно просим Тя, Владычице, освяти Божественною благодатию нас молящихся, и ополчением непобедимых Ангел Божиих огради град сей, врагов свирепство покаряющи, да благословим Господа во веки.

Священное изображение умиленно лобзающе Божественнаго Младенца Христа и Пречистыя Его Матере, молимся: сподоби нас, Христе Спасе, Воскресение жизни улучшить, вопиющих: благословен еси, Господи, во веки.

И поем Честнейшую.

Песнь 9.

Ирмос: Всяк земнородный да възиграется духом просвещае́мь, да торжествует же Безплотных Умов естество, почитающее священное торжество Богоматере, и да вопиет: радуйся всеблаженная Богородице, Чистая Приснодево.

Богоначальным мановением святая икона Твоя, Владычице, от лет древних хранимая, ныне явися яко чаша, благодать обильно изливающая, во ограждение града сего от зла. Темже с верою сердечною прославляюще Тя, Богородице, благодарственно величаем.

Ю́же изволил еси, Владыко, приими милостивно Молитвенницу о нас, Мать твою, и Твоя благи всяческая исполнятся; да Тя вси, яко Благодателя, величаем.

Из рода в род хранимая святыня, образ сей честный, молим Тя, Царице, да будет во освящение и исцеление душ и телес наших, да Тя во веки величаем.

Призри благосердием Твоим, Всепетая Дево, на люди Твоя, цельбоносному образу Твоему покланяющиеся, яко Тебе Самой, на нем изображенной Матери Господней, и Предвечному Младенцу Твоему, Егоже любовь объяла еси на Пречистых руках Твоих, молящи сохранить град сей и люди невредимы, да Тя во веки веков величаем.

Светилен:

Под кров Твой, Дево Госпоже, прибегаем вси роди человечести: просвети ны светом Рождества Твоего, грешнии раби Твои, молящиеся прилежно и покланяющиеся чудотворному образу Твоему, и просящие умирения миру и душам нашим велия милости.

На хвалитех стихиры, глас 2:

Приидите, возрадуемся державней заступнице рода нашего Царице Богородице, приидите к тихому и чудному Ея покрову веселящемуся; дарует бо верным обильныя дары целебныя от

неистощимаго источника милости, и тьмы избавляет нас, искушений и бед и обстояний, всех благочестно прославляющих и чтущих Ю, яко всеблагословенную Матерь Христа Бога.

О, Владычице, приими милостивно моления наша, и спасай нас всегда, яко Благая и Милостивая; да, с веселием лобызаем Пресвятую икону Твою, и присно радуящиеся, восхваляем и величаем Тя, обрadowанная Радосте верных раб Твоих.

Ины стихиры, глас тойже:

Радуйся, Палато Слова; радуйся, Невесто Невестная; радуйся, Радосте наша; радуйся, Мати Живота, благословен Плод чрева Твоего.

Радуйся, всеблагословенная Марие, Мати Христова; радуйся, сущая Радосте всего мира; радуйся, всеблагая Христианом Помощнице; радуйся, обидимых Заступнице; радуйся, недугующим скорое и известное Прибежище.

Радуйся, сирым и вдовицам Божественное Утешение; радуйся, всех нищих Покрове и Питательнице; радуйся, всем сущим в бедах скорое Избавление; радуйся, Богоневесто Владычице, упование Христиан.

Радуйся, всех Христиан Надеждо и Покрове, Богомати всенепорочная, всея твари честнейшая, небесных и земных славнейшая: родила бо еси всех Творца и Бога.

Слава, и ныне: глас 6

Днесь собори верных сошедшеся, духовно да торжествуем, и Богоотроковицу Деву Богородицу песньми благохвальными ублажим, глаголюще: Радуйся, Едина избранная от всех родов в Матерь Предвечнаго Слова; Радуйся, вместилище не вмещимаго всеми; Радуйся, Ангелов и Серафимов радости; Радуйся, пророков проповедание и похвало; Радуйся, Апостолов и святителей удобрение; Радуйся, мучеников крепосте и всех праведных славо; Радуйся, державный покрове верных; Ра-

дуйся, скорбящих Божественное утешение; Радуйся, в бедах и напастех скорое избавление; Радуйся, грешников всех прибежище и благая Заступнице; Радуйся, Благодатная и Обрадованная, с Тобою Господь, подай миру Тобою велию милость.

Великое славословие.

Тропарь, ектении и отпуст.

На Литургии служба вся Богородицы.

АКАФИСТ

Кондак 1

Возбранной Воеводе и Матери Света, Госпоже Царице и Владычице, благодарственное пение умиленною душою приносим раби Твои, Богородице. Тя бо Всеблагую дарова нам Христос Бог, яко всемогущую Заступницу града и страны нашей; Ты же, яко имущая милосердие неизреченное, предивно земли Полтавстей цельбоносную икону явила еси. Мы же, грешнии, толикия знамения чудес, от нея являемые, зряще, молим Тя, Всепетая: не посрами любовь прибегающих ко всечестному покрову Твоему, да избавльшися Тобою от всех зол и бед, со слезами и умилением зовем Ти: Радуйся, теплая к Богу Молитвеннице и Утешительнице, всеми оставленных Мати милосердная.

Икос 1

Архангели и Ангели, многоочитии Херувими и шестокрилатии Серафими и вси небеснии силы, зряще дивное знамение милости Божией, дарованное земли и граду нашему в новоявленной и цельбоносней иконе Твоей, Владычице, со страхом и трепетом воспевают Тя, благоуханный Храме Святаго Духа, одушевленный Кивоте Божий. Мы же, грешнии и недостойнии, вседрагую икону Твою, яко дар благодатный нам, земнородным, приемлюще, преклоняем колена пред величеством

Твоим, Богородице, и со слезами и трепетом восхваляем Ты сице:

Радуйся, лучезарный Свете, благодатию Своею всех верных освещающий;

Радуйся, Покрове радости, всечестную икону Твою яко облак над нами распростершая.

Радуйся, тою знамение новое милости Божией в церкви Полтавстей явившая;

Радуйся, в видимом образе невидимую благодать излившая.

Радуйся, яко в пречудней иконе Твоей Ты, яко живу сущу с нами ублажаем;

Радуйся, яко пред иконою Первообразным умиленно поклоняемся.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 2

Видяще пречудную икону Твою, небесе и земли Царице, в травнем зладе долу лежащу, и пречистую ланиту Твою на ней косою прободену, и слезу из предивных очес Твоих истекшую, боголюбивый муж веси Горбаневския ужасом многим содрагашеся, и пад на землю, со страхом и верою припаде ко святому образу, хвалу Тебе принося, ибо милостивно восхотела еси в видимом образе Твоем невидимую силу благодати и Матернего попечения явити земли и граду нашему, и всем радующимся о Тебе и Богу воспевающим: Аллилуиа.

Икос 2

Разум богопросвещен имея муж оный, с молитвою и трепетом прият на руце дивную икону Твою, Богородице, и принесе ю в дом свой; верова бо, яко с образом сим благодать Твоя и сила и врачевство сему миру духовное. Сего ради про-

поведа окрест всем людем о новоявленнем сокровищи, да не сокрыт будет сей источник чудес и благодати исцелений. Мы же с верою и благоговением притекающе к нему и духовную жажду утоляюще, славословити Тя дерзаем:

Радуйся, Препоблагословенная, в травнем злаце икону Твою святую мужу благоговейному явившая;

Радуйся, светоносная Палато, аки солнечными лучами благодати тую озарившая.

Радуйся, Красото пресветлая, язву на лице иконы Твоея приемшая;

Радуйся, Всемиловитая, слезу благодатную от нея дивно источившая.

Радуйся, вселенная Похвало, во граде нашем обителище Себе на земли устроившая;

Радуйся, благостыни Бездно, землю нашу чудесы великими прославившая.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 3

Силу Божию познавше чрез явленную цельбоносную икону Твою, Пресвятая Дево, православнии людие восхотеша дарми послужити Тебе, Всепетая; сего ради вместо кущи малая, в нейже первее всечестная икона Твоя водворена бысть, воздвигоша Тебе в веси Горбаневстей честный храм во славу всехвального Рождества Твоего. Зряще же, яко икона Твоя, Владычице, дивно прославляется в нем Господом, исповедаша Тя, яко в молитвах бодрую, и яко неисчерпаемое море милостей и щедрот, и скорое услышание в бедах всех, радостно воспевающих Богу: **А**ллилуиа.

Икос 3

Имуще благоутробное попечение о градах и весех Полтавских, осияла еси лучами благодати Твоея, Владычице, всех верных, со слезами и умилением к Тебе притекающих и исцеление недугов своих чрез дивную икону Твою приемлющих. Тии же благодарни суще, попечением иерея Божия Евтихия воздвигоша Тебе в веси Горбаневстей новый храм каменный, в немже Ты, Кивоте святыни небесныя, новое земное жилище восприяла еси. Все же вернии, притекающие к сему дому молитвы, воспеша Тя, Чистая, сице глаголюще:

Радуйся, Богоневесто прекрасная, земли Полтавския Покрове и ограждение;

Радуйся, Таиннице Божественная, храмов наших благословение и утверждение.

Радуйся, Очистилице миру, образ Твой честный во освящение и утешение нам даровавшая;

Радуйся, небесный Престоле, боголепный храм аки жертву Ти угодну приимшая.

Радуйся, Ангелами на небесех присно славимая;

Радуйся, Предстательнице наша пред Богом, милосердия двери нам отверзающая.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 4

Буря недоумения смущаше ум рабы Божией Екатерины, како достойно воспети неисчерпаемую щедрот Твоих бездну, Всеблагая, ей, люте страждущей, явленную. Тая бо, ни единыя пользы от врачей обретши, но паче в горшая пришедши, все упование токмо на Тя возложи. Сего ради притече в храм Твой и со слезами и верою припаде ко святей Твоей иконе, помощи взыскующи. Ты же, Милостивая, не посрамила еси веры рабы Твоея, и скоро воздвигла ю от одра болезни. По-

минающе сие и мы, грешнии, прославляем толикое Твое к людям милосердие, Сыну Твоему и Спасу нашему поюще: **Аллилуиа.**

Икос 4

Слышаще величие чудес Твоих и видяще токи благодати, изливаемые от чудотворных иконы Твоея, Владычице, прославляем Тя, Всепетая, со слезами от сердца молящеся Тебе: о, Прибежище наше и миру Радование, приими всякого человека, призывающа имя Твое на помощь, и молебное пение пред иконой Твоей совершающа; прияла бо еси вопль болящих рабы Твоея Анны, и исцеление подавши, радостию исполнила еси сердце ея. Сего ради молим Тя, Благая, потщися подати благодать Твою и нам, во многовидных бедах сущим, да благодарственная восписуем Ти:

Радуйся, Мати милосердная, руце Твои в помощь нам простирающая и от очес страждущих слезы отирающая;

Радуйся, обуреваемых пристанище, вся страсти наша побеждати научающая.

Радуйся, Помоще благодатная, жестокость сердец наших Твоею благодатию умягчающая;

Радуйся, яко на Тя упование возложивше, преплыти бездну моря житейского чаем.

Радуйся, яко в пречудней иконе Твоей залог милости вечныя обретаем;

Радуйся, яко молитвами Твоими греховное терние посекаем.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 5

Яко Звезды незаходимыя Мати, источаеши неоскудную милость Сына Твоего и Бога нашего на люди Твоя, и избав-

ляеши от бед всех, призывающих Твоего милосердия пучину. Сего ради, яко благая сущи и сострадати матерней скорби могущая, не отвергла еси тока слез матери отрока Тимофея, хотяща умерети, яже у одра предстоящи, мысленно с верою и упованием притекла ко святей иконе Твоей. Ты же врачевство скорое подавши ему, печаль матери на радость абие преложила еси. С нею и мы, грешнии, не умолчим никогда хвалу и благодарение Тебе приносить, Богу воспевающе: Аллилуиа.

Икос 5

Видев Тя, Непорочная Дево, на руку Огнь Божественный — Владыку Господа — неопально держащу и моления Ему о людех приносящу, раб Твой новопросвещенный иудеянин Афиноген, молебное пение пред святою иконою сотвори, благодаряще и верующе, яко токмо щедрот Твоих ради, молитвами иерея Божия Николая, исцеление от недуга смертного прият. Мы же, во всяцей беде и нужде сущии, аще и паче всех согрешихом и не престаем беззаконovati, обаче дерзаем славословити Тя:

Радуйся, Палато Духа Святаго, благоволением Отчим Сына Божия рождшая;

Радуйся, Родительнице Неискусобрачная, Христа Спаса во чреве носившая.

Радуйся, Лестнице небесная, Бога с человеки возсоединившая;

Радуйся, Всеблагомощная, яко Тобою Рожденным тьма разрушися и род человеческий от потопа греховнаго спасеся.

Радуйся, всем уповающим на Тя избавление от напрасныя смерти и непостыдну кончину жития дарующая;

Радуйся, всех призывающих Тя наследники жизни вечныя являющая.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 6

Проповедует Церковь Христова приснотекущую и многоцелебную реку благодати Твоея, Владычице, еюже напаяеши всех песнословящих Тя пред чудотворною иконою Твоею. Тя бо, у Креста предстоящу, Сын Твой и Бог возлюбленному ученику в Матерь нарече и сим вся верующия в Него Тебе усынови. Ты же, приемши во святая Своя Матерния объятия весь род Христианский, печешися и болезнуеши о всех чадах Твоих. Ведущи сия, боголюбивая болящая жена иерея Александра от земли Вятския, со дерзновением и верою моление о исцелении пред Пречистым Твоим образом вознесе. Избавление же от недуга приемши, купно с супругом своим благолепно украси ризы иконы Твоея, до конца живота милость Твою памятующе и Богу неумолчно взывающи: Аллилуиа.

Икос 6

Возсияла еси, Богомати, в пречудней иконе Твоей болящему слепцу иерею Василию, яко Светильник, елеем милости преисполненный. Ни единыя бо пользы от врачей приемши, к чудному заступлению Твоему притече, веруя, яко и малое моление Тебе приносяще, тяжких недугов приемлют исцеление. Сего ради пришед во храм, с теплою молитвою облобызда дивную икону Твою, и взял список с нея, аки бы залог благодатного Твоего в нем произволения, принесе и благоговейно постави той в доме своем, имя Твое святое на помощь призывающе. Исцеление же скоро улучив, со благоговением воспе Тя, Любы неоскудная, сице Тебе зовуще:

Радуйся, Агнице Чистая, крест скорбных испытаний Сама добльственнно понесшая;

Радуйся, Мати благая, Твоим сострастием Кресту и нам крестоношение облегчившая.

Радуйся, Единое наше Упование, любящих и чтущих Тя в бедах не оставляющая;

Радуйся, дерзновенно бездну милости Божия на нас призывающая.

Радуйся, Прибежище наше, в годину бедствий на помощь нам ускоряющая;

Радуйся, рыданий и слез наших не отмечающая, и отчаянных из рова погибельного исхищающая.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 7

Хотя Всемиловитый Сын Твой и Бог спасение миру устроити, дарова во всечестных иконах Твоих, Владычице, помощь, покров и защиту людем Своим. Ведуще сия и веруя, яко Ты еси благословение домов благочестивых, восхотеша и людие полтавстии явлением всечестныя иконы Твоея освятити стогны града и дома своя. Сего ради умолиша власти церковныя крестный ход из веси во град уставити, и от того часа в коеждо лето, подъемше дивную икону Твою светло украшену, с пением и песньми духовными, вносиша ю во град, водворяюще в Соборном храме. Все же вернии текше в сретение ея, вопияше Богородице: Ей, гряди, Голубице Чистая! и падши пред святою иконою, поклоняхуся той, яко Тебе Самой сущей, Богу воспевающе: Аллилуиа.

Икос 7

Яко новая и светоносная палата, явися, Владычице, Соборный храм града нашего, в немже Ты, Пречистая, жилище Себе восприяти благоизволила еси. Крину белоснежному, благоуханному, и звезде лучезарней уподобися в нем всечестная икона Твоя, Невесто Невестная. Воистинну, благословенна Ты в женах, и дивно смирение Твое, яко не гнушаеши скверн наших, но и доныне явлением Твоея иконы освящаеши град наш и дома наша. О, Всепетая Мати, обнови и нас бла-

годатию милости Твоея, да радуешься о Твоем посещении, хвалу Тебе приносим таковую:

Радуйся, Горо благодати небесная, обитель Свою земную утверждающая;

Радуйся, пресветлый Облаче, светом немерцающим всех нас просвещающая.

Радуйся, Надеждо ненадежных, в скорбех и печалех всеблагое Утешение всем подающая;

Радуйся, Скоропослушнице, молитвы смиренных слушающая и ко Престолу Небесного Царя возносящая.

Радуйся, сладосте сердечная, скорбь нашу силою Божиею в радость претворяющая;

Радуйся, Едина Нескверная, от сна греховного нас пробуждающая.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 8

Странники и пришельцы есмы на земли сей, в скорбех и болезнях многих града Небесного взыскующия. Ты же, Богомощная, по Бозе Едина еси наше прибежище. Привлецы же всех, пред святою иконою Твоею покланяющихся, от любви земных к Небесней Божественней любви, к сокровищу некрадомому и Бисеру многоценному, иже есть Христос Бог. Да неколеблемо храняще веру православную, не отступим от Спаса нашего, ниже да постыдимся имени Его. Той бо есть крепость наша и сила, Бог и радование. Ему Единому покланяемся, поюще: Аллилуиа.

Икос 8

Всяк земнородный да взыграется духом, зря вседрагую икону Твою, Пренепорочная, во храме нашем предлежащу. Да не рыдают убожества своего человецы, погружаемые в пе-

чаль и уныние: се бо Мати Живота, Божественною славою преукрашенная, в Скинии Небесней Сыну Своему предстоит, пречистии руце Своя к Престолу Божию простираючи, да нас светом Боговедения обогатит. О, Госпоже Всечестная, содей сердца наша храмы Духа Святаго, да не вторгнется в них греховная скверна, но Сама пребуди во Святая Святых душ наших, да благодарными устнами хвалу Тебе принесем такую:

Радуйся, Всеблаженная, во успении Твоем нас сирых и беспомощных не оставившая;

Радуйся, Реко многоводная, от иконы Твоея струи благодатныя источающая.

Радуйся, Звездо путеводная, от любви земныя к Небесней Божией любви нас приводящая;

Радуйся, скорая Целительнице, единым токмо прикосновением ко святей иконе Твоей исцеления дарующая.

Радуйся, небеси подобная во славе Твоей святей;

Радуйся, земле, израстившая нам Плод животный.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 9

Всякия суеты и житейския сладости устранимся, предстояще святей и пречудней иконе Твоей, Богородице. Кии же хвалы принесем Ти, Дево Чистая, како воспоем величие Твое небесное и неисчерпаемое к людям милосердие. Ибо и до днесь не престаеши спасати всех нас, грехами обремененных; без числа бо беззаконовахом, колькраты святыя Тайны Христовы приимахом, первее глаголюще: помилуй нас, и паки на грех обращаемся. Ты же, Всеблагая, не остави нас погибнути в сицевой глубине зол сущих, сотвори, да не погибнем без покаяния и Святых Таин напутствия, во еже выну нам благодарити Господа, поя Тому: **Аллилуиа**.

Икос 9

Витийство человеческое недоумет о Тебе, Богородице, зрящи сияние славы и толикия знамения милости от святых иконы Твоя являемая. Ты бо еси Очистилице мирови, христианом же всем Прибежище и неложная Хранительница. О, Мати Божия, мира Владычице, разжени тьму, омрачающую души наша. Аще и согрешихом паче блудницы, слез покаяния тоя отнюд не имамы, ниже что доброе в нас обретается. Но, яко всемогущая Заступница наша, даждь нам слезы, да поне мало что оплачем от безмерных беззаконий наших, и спасаемии Тобою, воззовем Ти:

Радуйся, Мати Божия, к Невечернему Свету — Христу Богу — сердца наша обращающая;

Радуйся, Сокровище нетленное, тленные радости мира сего презирати нас научающая.

Радуйся, Столпе огненный, хладныя сердца наша огнем Божия любви воспламеняющая;

Радуйся, к Престолу благодати Пречистых и Животворящих Таин приступати нам помогающая.

Радуйся, Избавительнице наша, от насильства диавольскаго уповающих на Тя свободяющая;

Радуйся, Твоим предстательством от ядовитаго прилога вражия нас спасающая.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 10

Спасти хотя избранную Тобою паству Полтавскую от колебаний, ересей и расколов, явила еси знамение милости Твоея, о Богомати, егда открыла еси Себе рабу Твоему Георгию в пречудней иконе Твоей, яко живу сущу с нами; токи же слезныя лияху дивныя очи Твои. Страшное и странное явление сие слышаще, познаем, яко воистину терпиши горчайшия му-

ки, зря неверие и озлобление душ наших, отвращающихся Сына Твоего и Бога. О, Госпоже Всемиловитая, не остави нас Твоим предстательством, да выну чистотою возвышается Церковь наша, и превозносится в ней величество Единосущныя Троицы, Ейже мы во веки поем: Аллилуиа.

Икос 10

Стена нерушимая, Гора несекомая и Щит непобедимый Ты еси, Благая Богородительнице. Единой бо токмо Тебе дадеса, да всякое прошение наше Твоим ходатайством во благо исполняется. и аще бо Ты не предстояла молящи, кто бы избавил нас от праведнаго суда Божия, на немже имамы истязаны быти и в тех, яже не вменяхом за грех, зряще, яко корабль церковный влается среди бури неверия, ересей и расколов. Но Твоим заступлением и помощью избави нас от смертоноснаго нечувствия, да очищени и оправдани воззовем Ти сице:

Радуйся, кающихся грешников пред Богом крепкое Заступление;

Радуйся, подающая изнемогающим силу и терпение.

Радуйся, Покровительнице наша, гнев Божий, праведно на ны движимый, на милость претворяющая;

Радуйся, Путеводительнице, несмысленных на греховном пути премудро запинаящая.

Радуйся, Отрадо сердечная, христианскую кончину живота нашего непостыдну и мирну верным дарующая;

Радуйся, всесильная Царице, в день Страшнаго Суда неосужденно стати одесную Бога нас сподобляющая

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 11

Пением и песньми духовными восхваляем Тя, Небесе и земли Царице, высшую небес и чистшую светлостей солнеч-

ных. Величаем Тя, Мати Агнца Непорочнаго, пришедшаго в мир распятие претерпети и обновити растлевшее грехом естество наше. Ты убо от Своих Пречистых кровей Плоть Сыну Твоему заимодавшая и тем дивною пособницею спасения нашего явившаяся, обновлению нашему послужила еси. Сего ради молим Тя, неизреченную в милости: просвети нас светом Сына Твоего, да не отлучени будем любви Божией, но о Христе греху умерши, и Христу приобщившись, со Христом и воскреснем, поюще Ему: Аллилуиа.

Икос 11

Яко свеща нерукотворна предстоиши, Дево Чистая, Престолу славы Бога Вседержителя, за христианы молящися. Обещалася бо еси с нами быти до скончания века. Сего ради радуется о Тебе всякая тварь, и яко Подательницу всяких благ, воистинну ублажают Тя вси роди. Такожде и мы, грешнии, величаем Тя, Единую непостыдную надежду нашу и молим Тя: простри руку помощи Твоя всякому человеку, пред святою иконою Твоею молящемуся, да не отыдет от лика Твоего тощ и неуслышан. Но яко имущая державу непобедимую, избави молитвами Твоими от всякия нечистоты всех, славословящих Тя сице:

Радуйся, Храме Господень, Церкви небесная и земная украшение;

Радуйся, всечудное всех с Богом примирение, и в будущем веке радость и защищение.

Радуйся, страдальцев венчание, и всем Крест Христов на ся взявшим, всемогущая Помощнице;

Радуйся, в грозный час смерти пред Сыном Твоим и Богом дерзновенная наша Предстательнице.

Радуйся, Заступнице усердная, за отпадших от пути истины души Судию умилоостивляющая;

Радуйся, молитвами Твоими очи наша от вечного плача избавляющая.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 12

Благодать, данную Ти от Бога, изливаеши неоскудно, Владычице, на вся православныя люди, воспевающая величие Твое небесное и покланяющиеся чудотворному образу Твоему. Сего ради молим Тя, верную Путеводительницу нашу: управи Сама пути жизни наша к Царствию Небесному. Веруем, яко в грядущем веце несть ни болезни, ни печали, ни воздыхания, но жизнь бесконечная, свет немеркнущий, любви неоскудевающая, радость в Бозе общения нерасторгаемого душ боголюбивых. Сопричти и нас избранному стаду Христа Бога нашего, да выну благодарение приносяще, воспоем Ему: Аллилуиа.

Икос 12

Поюще Твоя чудеса, славим Тя, огнезrachный Престоле непостижимаго Царя, одушевленный Храме, невместимаго Бога вместивший. Тобою бо содеяся спасение миру: из Тебе воплотивыйся Христос Бог, дарова нам Святыми Тайнами Тела и Крове Своея обожение и область быти чадами Божиими. Ты же и до днесь руце Твои в помощь нам простираеши, и от многоцелебнаго образа Твоего многия и богатая милости людем Твоим низпосылаеши. О, Владычице, милостива сотвори нам Сына Твоего: много бо может молитва Матерняя на умоление Владыки. Сотвори нас причастники быти вечныя радости, да Тобою спасаеми, восхвалим Тя сице:

Радуйся, Мати Жизни вечныя, смертное естество наше бессмертием просвещающая;

Радуйся, самых отчаянных надеждою спасения увеселяющая.

Радуйся, яко вси труждающиеся и обремененнии в Сыне Твоем упокоение обретают;

Радуйся, яко Тобою в житии своем таковии жало страстей в себе умерщвляют.

Радуйся, Одигитрие, путь ко обителем горним покаянием отверзати нас научающая;

Радуйся, Радосте светлая, молящихся Тебе посещения Твоего сподобляющая.

Радуйся, теплая к Богу Молитвеннице и Утешительнице, всеми оставленных Мати милосердная.

Кондак 13

О, Всепетая и Всехвальная Радосте наша, благостыни Бездно, Богоневесто Владычице! Не отврати лица Твоего от нас, не отрини слез и воздыханий наших, воздвигни нас из глубины отчаяния и покрый покровом милости Твоея. О, Свете омраченных душ наших, даруй нам слезы покаяния и исповедания грехов наших, сподоби нас неосужденно причащаться Святых и Животворящих Таин Сына Твоего, да неотступно в веце сем и по смерти будет от нас милосердие Его. И по кончине живота нашего сподоби нас часть спасаемых улучшить и со всеми Богу угодившими пети песнь неумолкаемого радования: Аллилуиа.

Сей кондак глаголи трижды и паки чти Икос 1

Архангели и Ангели, многоочитии Херувими и шестокрилатии Серафими и вси небеснии силы, зряще дивное знамение милости Божией, дарованное земли и граду нашему в новоявленной и цельбоносней иконе Твоей, Владычице, со страхом и трепетом воспевают Тя, благоуханный Храме Святаго Духа, одушевленный Кивоте Божий. Мы же, грешнии и недостойнии, вседрагую икону Твою, яко дар благодатный нам, земно-родным, приемлюще, преклоняем колена пред величеством

Твоим, Богородице, и со слезами и трепетом восхваляем Тя сице:

Радуйся, лучезарный Свете, благодатию Своею всех верных освещающий;

Радуйся, Покрове радости, всечестную икону Твою яко облак над нами распростершая.

Радуйся, тою знамение новое милости Божией в церкви Полтавстей явившая;

Радуйся, в видимом образе невидимую благодать излившая.

Радуйся, яко в пречудней иконе Твоей Тя, яко живу сущу с нами ублажаем;

Радуйся, яко пред иконою Первообразным умиленно поклоняемся.

Радуйся, теплая к Богу Молитвеннице и Утешительнице, всеми оставленных Мати милосердная.

Посем же:

Кондак 1

Возбранной Воеводе и Матери Света, Госпоже Царице и Владычице, благодарственное пение умиленною душою приносим раби Твои, Богородице. Тя бо Всеблагую дарова нам Христос Бог, яко всемогущую Заступницу града и страны нашей; Ты же, яко имущая милосердие неизреченное, предивно земли Полтавстей цельбоносную икону явила еси. Мы же, грешнии, толикия знамения чудес, от нея являемые, зряще, молим Тя, Всепетая: не посрами любовь прибегающих ко всечестному покрову Твоему, да избавльшися Тобою от всех зол и бед, со слезами и умилением зовем Ти: **Р**адуйся, теплая к Богу Молитвеннице и Утешительнице, всеми оставленных Мати милосердная.

Молитва:

О, пресветлый Облаче, Мати Бога Вышняго, Небесе и земли Царице, от всех родов избранная, Херувимов светлейши и Серафимов честнейши сущая! Ты еси любовь неизреченная и всеми оставленных едина надежда. Сего ради молим Тя, известную о нас к Сыну Твоему молитвенницу и Заступницу нашу: не отврати лица Твоего от нас, но приими всеблагое поклонение чудотворней иконе Твоей, яже, яко отрасль живоносного духовного сада и цвет благовонный на земли Полтавстей процвете. Не имамы бо инаго в бедах избавления, разве Тебе, Дево Чистая! Отверзи нам двери милосердия Твоего, и огради от всякаго навета вражия и клеветы человеческия! Зриши бо, Милостивая Мати, бездну беззаконий наших, наги бо есмы всякаго деяния блага, и не токмо волею, но и неволею в многоразличныя прегрешения впадаем. Темже и взываем Ти: ради единыя милости Твоея не остави нас погибнути, в сицевой глубине зол сущих, но спаси и на путь покаяния настави! Паче бо прокаженного имамы нужду в очищении, нечисто бо суть одеяние душ наших, и не имамы избегнути осуждения. Но аще Ты еси надежда ненадеждных, прости руку помощи Твоея и из рова погибельнаго исхити. Ум наш познанием Божественныя истины просвети, и в сердца наша кротость Христову и любовь вкорени. Огради нас от всяких искушений, от мира греховнаго, плотских похотей и диавола сетей избави. О, Всемиловитая Госпоже, Мати человеколюбивая, Ты убо еси Едина наша Споручница спасения и житию исправление. Ты дарована грешником яко надежда державная Сыном Твоим, Заступнице Теплая, в бедах и печалех утешение и с Богом примирение. Объемли нас долготерпеливою Твоею Матернею любовию, защити страну нашу от глада, труса, потопа, огня, меча и нашествия иноплемеников. Церковь нашу Православную от неверия, ересей и расколов сохрани. Отпадших от веры просвети и на путь правый настави. Житие наше в мире утверди. Прежде отшедшим отцем и

братиям нашим прощение грехов и со святыми упокоения испроси. Ей, Владычице Всемилостивая! Услыши воздыхания душ наших, даруй нам кончину живота нашего Христианскую, безболезненну, непостыдну, мирну, и сподоби нас доброго ответа на Страшном Суде Сына Твоего, да Тобою присно храними, Богу во Святей Троице славимому благодарение приносяще, восхвалим Тя, Упование наше, во веки веков. **Аминь.**

Украинская Православная Церковь. Полтава 2001

Служба и акафист Пресвятей Богородице пред чудотворной Ея иконой Горбаневской / С машинописных изданий: «Служба Пресвятей Госпоже Владычице и Приснодеве Марии в прославление чудотворныя иконы Ея Горбаневския» и «Акафист Пресвятей, Пречистой Деве Богородице в честь чудотворныя иконы, именуемая Горбаневская». — Полтава: Храм святого Великомученика и Целителя Пантелеимона, 2001.

© Священник Георгий Зверев (редакция, макет, оформление), 2001